



Ngaphesheya KweKhethini LesiKhathi

William Marrion Branham



# Ngaphesheya KweKhethini LesiKhathi

Ngokunye ukusa ngangicambalele embhedeni wami. Futhi nga...ngangikade ngizumekile, futhi ngaphupha uJoseph egula, futhi ngangimthathile ukuba ngimkhulekele. Futhi ngenkathi sengivuka, ngakhathazeka kakhulu. Ngathi, “Awu, mhlampe uJoseph uzogula.”

Futhi ngabuka, kuhamba phambi kwami, ethunzini elincane, elimnyama, kakhudlwana kungumbala othi awube nsundu. Futhi kwabonakala sengathi kwakuyimi. Futhi ngakuqaphelisisa. Futhi okwakuza ngemuva kwakunguMuntu othize omhlophe, futhi kwakunguYe. Ngabuka ngale komkami, ukubona ukuthi wayephapheme yini, ukuze ngimkhombise, uma engawubona umbono. Kodwa wayelele.

Ngathi, “O, ngiyaxolisa, Nkosi. Kodwa, lokho bekuyimpilo yami. Ubuyilokhu ungiqhubela kukho konke engikwenzile. Sonke isikhathi uma bekwenzeka noma yini, bengiyaye ngicabange ukuthi kwakusuke kunguWe okwenzayo. Futhi ngiyaqonda ukuthi kwakunguSathane ezama ukungidedisa kukho.” Ngathi, “Uma nje kuphela Ungangihola.” Futhi lapho ngibuka, ngabona ubuso obuhle kunabobonke engake ngabubona kumuntu. Wayengaphambi kwami, ebuka emuva. Waphakamisa isandla saKhe wase ebamba esami, wase eqala ukuya *ngapha*. Umbono wangishiya. NgeSonto eledlule ekuseni, ngase, ngisheshe ngavuka. Lokho kwaba ngoMgqibelo, lombono. Ngo...

Bengihlale ngikhathazekile, bengihlale ngicabanga ngokufa. Khona, mina nginamashumi amahlanu, yiwo,

isikhathi sami asi...angicabanganga ukuthi kwase kuyisikhathi eside. Futhi ngangimangala ukuthi kazi ngiyoba yini kulowomzimba-moya, umzimba wasezulwini. “Ngabe kuyoba ngukuthi ngiyobabona abangane bami abathandeka kakhulu futhi, ngithi, inkungu encane emhlophe yedlula, bese ngithi, ‘Nanguya umfowethu Neville ehamba,’ kumbe, angasho ukuthi, ‘Halo, Mfowethu Branham?’ Futhi uma sekufika uJesu, bese ngibuye ngibe umuntu futhi.” Ngangihlala njalo ngicabanga ngalokho.

Ngangiphupha ngihambe eNtshonalanga. Futhi mina ngiza ngehla ngidabula endaweni enezihlahlanyana ezincane zokunonga, nomkami wayenami, futhi sasikade sidoba izinhlanzi amatrawuthi. Futhi ngama nga—ngavula isango. Nesimo sezulu sasisihle kabi. Sasingabukeki njengoba senza phezu kwesigodi lapha. Sasiluhlaza okwesibhakabhaka, namafu amahle amhlophe. Futhi ngathi kunkosikazi, ngathi, “Kufanele ngabe kade, saphuma seza lapha, s’thandwa.” Wathi, “Ngenxa yabantwana, besifanele, Billy.” Ngathi, “Lokho...” Ngase ngivuka.

Ngacabanga, “Ngaphupha kangaka! Angazi ukuthi yingani?” Futhi ngabuka phansi, futhi wayelele eduze kwami.

Ngase ngivuka emqamelweni wami, njengoba iningi lenu bantu nike nakwenza, ngabeka ikhanda lami phezu kwe—kwepulangwe lombhede, ngase ngibeka izandla zami emva kwami. Futhi ngangicambalele lapho *kanje*. Ngase ngithi, “Awu, impela angazi ukuthi kuyoba yini, ngaleya. Sengivele nginamashumi amahlanu, futhi angikenzi lutho nokho. Uma nje ngingenza okuthile

ukuba ngisize iNkosi, ngoba ngiyazi ukuthi angiyikuba ngofayo. Ingxenye yesikhathi sami isiphelile, empeleni, kumbe ngaphezu kwengxenye. Uma ngingaphila ngibemdala njengabantu bakithi, nakhona lapho ingxenye yesikhathi sami isiphelile.” Futhi ngaqalaza. Ngangicambalele lapho, ngilungela ukuvuka. Kwakucishe kube ngelesikhombisa nqo. Ngathi, “Ngikholwa ukuthi ngizokwehla ngiye enkonzweni, namhlanje ekuseni. Uma ngishe izwi, ngizothanda ukuzwa uMfowethu Neville eshumayela.”

Ngakho ngathi, “Usuvukile, s’thandwa na?” Futhi wayelele zwi.

Futhi angifuni nikugeje lokhu. Kungiguqulile. Ngingeke ngisaba yilowoMfowethu Branham ebenginguye.

Futhi ngabuka. Futhi ngezwa enye Into, iyilokhu ithi, “Usaqala nje. Phikelela empini. Yiba uyilokhu uphikelele.”

Nganyakazisa ikhanda lami umzuzu. Ngacabanga, “Cha, mhlampe ngicabanga kanjena nje.” Uyazi, umuntu angathola imicabango nje. Futhi ngathi, “Mhlampe bengizicabangela nje lokho.”

Kwathi, “Phikelela empini. Qhubeka. Qhubeka.”

Ngathi, “Mhlampe kushiwo yimina.” Futhi ngafaka izindebe zami zomlomo phakathi kwamazinyo ami, ngase ngivala umlomo wami ngesandla sami.

Futhi nakho Kufika futhi, kwathi, “Yiba ulokhu uphikelele. Uma nje ubuwazi ukuthi kunjani ekupheleni kwendlela!”

Futhi kwaba sengathi ngiyamuzwa uGraham Snelling, kumbe omunye, owacula leluculo kanje. Balicula lapha, Anna Mae nani nonke nonke.

Ngikhumbule ekhaya ngijahile, futhi  
ngifuna ukubona uJesu.  
Ngithanda ukuzwa lezozinsimbi  
ezimnandi zokungamukela zikhala.  
Kuyokhanyisa indlela yami futhi  
kushabalalise konke ukwesaba.  
Nkosi, mangibuke ngale kwekhethini  
lesikhathi.

Nake nalizwa liculwa lapha enkonzweni.

Futhi ngezwa Into ethile ithi, “Ungathanda ukuba uke ubuke ngaphesheya kwekhethini na?”

Ngathi, “Kuzongisiza kakhulu.”

Ngase ngibuka. Ngomzuzwana nje, ngi... Ukuphefumula kanye ngase ngifike endaweni encane eyayitshekile. Ngabuka emuva, futhi ngangilapho, ngilele embhedeni. Futhi ngathi, “Yinto eyisimanga lena.”

Manje, angithandi nikuphinde lokhu. Lokhu kuphambi kwebandla lami, noma izimvu zami engizelusayo. Noma kwakuyini, ngangikulomzimba noma ngiphumile, noma kwakungukuguqulwa, kwakungenjengawo noma yimuphi umbono engake ngaba nawo. Ngangikwazi ukubuka Laphaya, futhi ngangikwazi ukubuka lapha.

Futhi lapho sengifika kuleyoNdawo encane, angikaze ngibabone abantu abaningi kangaka beza begijima, bememeza, “O, mfowethu othandeka kakhulu!”

Futhi ngabuka. Nabesifazane abasha, mhlawumbe bedonsela lapha emashumini amabili eminyaka, eshumini

nesishiyagalombili kuya emashumini amabili, babengigaxa, futhi bememeza, “Mfowethu othandeka kakhulu!

Nakhu kuza izinsizwa, ezilapha ebunsizweni obuqhamileyo. Namehlo azo ekhazimula futhi ebukeya njengezinkanyezi ebusuku obumnyama. Amazinyo azo emhlophe njengobuhlalo obuligugu. Futhi zazimemeza, zingihwaphuna, futhi zimemeza, “O, mfowethu othandeka kakhulu!”

Futhi ngama, futhi ngabuka. Futhi ngangimusha. Ngabuka emuva emzimbeni wami omdala ulele laphaya, izandla zami zisesiphundu sami. Futhi ngathi, “Angikuqondi lokhu.”

Nalaba besifazane abasha bengigaxa. Manje, ngiyazi ukuthi sixubene lapha, futhi ngikusho lokhu ngobumnandi nangesizotha sikaMoya. Bantu besilisa ningeke nigaxe abesifazane ngengalo kungabibikho okunyakazayo emizweni; kodwa kwakungekho Laphaya. Kwakungekho zolo noma ikusasa. Babengakhathali. Babe... Angikaze ngibabone abantu besifazane abahle kanjeya empilweni yami yonke. Babenezinwele ezize zayoshaya maqondana nokhalo lwabo; iziketi ezinde zifika ezinyaweni zabo. Futhi babengigona nje. Kwakungesikho ukugona, engingakugonwa ngisho ngudadewethu uqobo, ohlezi laphaya. Babengangiqabuli, futhi nami ngangingabaqabuli. Kwakuyinto e—engingenawo a—amagama asetshenziswayo ekukhulumeni, anginawo amazwi okukusho. “Ukuphelela” alifiki nakancane kukho. “Okuhle hle” nalo alifinyeleli, ndawo. Kwakuyinto engingakaze... Kungcono uziyele wena Lapho.

Futhi ngabuka *ngapha, nangapha*. Futhi babeza, ngezinkulungwane. Futhi ngathi, “Angikuqondi lokhu.” Ngathi, “Awu, ba . . .”

Futhi nakhu sekuqhamuka uHope. Lowo kwakungumkami wokuqala. Wagijima, futhi akazange asho ukuthi, “Myeni wami.” Wathi, “Mfowethu othandeka kakhulu,” futhi lapho engigona. Kwakukhona omunye wesifazane owayemi lapho, obese-ke wangigona, noHope wagona lona wesifazane; futhi ngamunye. Futhi ngacabanga, “O, lokhu kumele ukuba yinto eyehlukile. Kungeke kwenzeke . . . Kukhona okuthize . . .” Ngacabanga, “O, ngisayoke ngiphinde ngifune ukuba ngike ngiphinde ngibuyele kulesiya sidumbu esidala futhi?”

Ngaqalaza ngaleyonkathi. Ngacabanga, “Kuyini lokhu na?” Futhi ngabuka, kahle ngempela. Futhi nga-ngathi, “A—angikuqondi lokhu.” Kodwa uHope wayebonakala enjenge, o, isimenywa esihloniphekile. Wayengehlukile, kodwa nje enjengesimenywa esihloniphekile.

Futhi ngase ngizwa Izwi-ke elakhuluma nami, elalisendlini, lathi, “Nakhu owakushumayelayo kwakunguMoya oNgwele. Lolu wuThando oluphelele. Futhi akukho okungangena Lapha kungenaLo.”

Sengiphokophelele kakhulu, kunakuqala empilweni yami, ukuthi kuthatha uThando oluphelele, ukungena Lapho. Kwakungekho mona. Kwakungekho kukhathala. Kwakungekho kufa. Ukugula kwakungeke, phakathi Lapho. Ukufa; kwa—kwakungeke kwakwenza ubemdala. Futhi i . . . Babengakhali. Kwakungukujabula nje kuphela.

“O, mfowethu othandeka kakhulu!” Futhi bangithatha bangikhuphula, base bengihlalisa endaweni enkulu ebanzi ephakemeyo.



Ngacabanga, “Angiphuphi. Ngibuka emuva emzimbeni wa—wami olele phansi lapha embhedeni.”

Futhi bangihlalisa phezulu laphaya. Ngase ngithi, “O, bengingafanele ngihlale phezulu lapha.”

Futhi nakhu kufika abesifazane nabesilisa, nxa zombili, bephelele nje ebusheni, bememeza. Nomunye besifazane wayemi lapho, futhi wamemeza, “O, mfowethu othandeka kakhulu! O, siyajabula kakhulu ukukubona Lapha.”

Ngathi, “Angikuqondi lokhu.”

Kwase kuthi leloZwi elalikhuluma, phezu kwami, lathi, “Uyazi, kulotshiwe eBhayibhelini, ukuthi, ‘Abaprofethi baqoqwa nabantu babo.’”

Futhi ngathi, “Yebo. Ngiyakukhumbula lokho emiBhalweni.”

Lathi, “Kodwa, lokhu kuyoba mhla usubuthana nabantu bakho.”

Ngathi, “Kanti bayoba ngabantu ngempela, futhi ngiyabathinta.”

“O, yebo.”

Ngathi, “Kodwa, kukhona izigidi. Ababaningi kangako oBranham.”

Futhi leloZwi lathi, “Abasibo oBranham. Bangabaphendulwa nguwe. Yilabo owabaholela eNkosini.” Futhi lathi, “Abanye babo abesifazane lapho, ocabanga ukuthi bahle kakhulu, base bedlule emashumini ayisishiyagalolunye eminyaka ubudala ngenkathi ubaholela eNkosini. Akumangalisi bememeza, ‘Mfowethu othandeka kakhulu!’”

Futhi bamemeza, kanye kanye, bathi, “Ukuba wawungahambanga, ngabe asikho Lapha.”

Ngaqalaza. Ngacabanga, “Cha, angikutholi.”

Ngathi, “O, uphi uJesu na? Ngifuna kabi, ukuMbona.”

Bathi, “Manje, Uthe ukuphakama kancane, phezulu nje khona *ngapho*.” Bathi, “Ngelinye ilanga Uyoza kuwe. Niyabona na?” Bathi, “Wathunyelwa, ukuba ngumholi. NoNkulunkulu uyofika. Futhi uma Efika, Uyokwahlulela wena ngalokho owabafundisa khona, kuqala, ukuthi bayangena noma qha. Siyohamba singene ngokufundisa kwakho.”

Ngathi, “O, ngiyabula kakhulu. Futhi, uPawulu, ngabe naye uzoma kanjena na? Ngabe noPetru uzoma kanjena na?”

“Yebo.”

Ngathi, “Ngakho-ke ngashumayela onke amaZwi abawashumayelayo. Angikaze ngehluke kuLo, ngapha nangapha. Lapho ababhaphathiza khona eGameni likaJesu Kristu, ngakwenza nami. Lapho abafundisa khona umbhaphathizo kaMoya oNgcwele, ngakwenza nami. Noma yini abayifundisayo, ngayenza nami.”

Nalabobantu bamemeza, bathi, “Siyakwazi lokho. Futhi siyazi ukuthi siyohamba nawe, ngolunye usuku, sibuyele emhlabeni.” Bathi, “UJesu uyofika, futhi uyokwahlulelwa ngokweZwi osishumayeze lona. Bese-ke uma wamukelwa ngalesosikhathi, futhi okuyobanjalo,” futhi bathi, “lapho-ke uyosiyisa kuYe, njengemiklomo yakho yenkonzo yakho.” Bathi, “Uyosiholela kuYe, bese, sonke kanyekanye, siyobuyela emhlabeni, ukuyohlala phakade.”

Ngathi, “Ngibuyele emuva manje na?”

“Yebo. Kodwa qhubeka uphikelele.”

Ngabuka. Futhi ngangibabona abantu, ngibabona kude le, beseza, befuna ukungigona, bememeza, “Mfowethu othandeka kakhulu!”

Kwathi khona lapho Izwi lathi, “Konke lokho owawulokhu ukuthanda, nakhokonke lokho okwakulokhu kukuthanda, uNkulunkulu ukunike wena Lapha.” Futhi ngabuka. Futhi nakhu kuqhamukainja yami endala, iza ikhuphuka. Nakhu kuqhamuka ihhashi lami, lafike labeka ikhanda lalo phezu kwehlombe lami, layiyiza. Kwathiwa, “Konke lokho owawulokhu ukuthanda, nakho konke lokho okwakulokhu kukuthanda, uNkulunkulu ukunikele esandleni sakho, ngenxa yenkonzo yakho.”

Futhi ngazizwa ngisuka kuleyoNdawo enhle.

Futhi ngaqalaza. Ngathi, “Usuvukile, s’thandwa na?” Wayesalokhu elele.

Futhi ngacabanga, “O Nkulunkulu! O, ngisize, O Nkulunkulu. Ungangivumeli ngiyekelele nangelilodwa iZwi. Mangihlale ngiqonde ngqo phezu kwaleloZwi, ngiLishumayele. Angikhathali ukuthi kuzani noma kuhambani, ukuthi ubani wenzani; ukuthi bangaki oSawulu bamadodana kaKishi, avukayo, kungakanani *lokhu*, *lokho*, noma *lokhuya*. Makuthi mina, Nkosi, ngiphikelele kuleyoNdawo. Konke ukwesaba ukufa. . .

Ngikusho lokhu, neBhayibheli lami liphambi kwami, namhlanje ekuseni. Nginomfanyana laphaya, oneminyaka emine ubudala, osadinga ukukhuliswa. Nginentombazane eneminyaka eyisishiyagalolunye ubudala; nebhungu,

engibongayo ngabo, okuphendule indlela yeNkosi. Nkulunkulu, mangiphile, ukuze ngibakhulise emyalweni kaNkulunkulu.

Ngaphezu kwalokho, umhlaba wonke jikelele ubonakala umemeza mina, abesifazane abanamashumi ayisishiyagalolunye eminyaka ubudala nabesilisa, nezinhlobo zonke. “Ukuba awuhambanga, besingeke sibe Lapha.”

Futhi, Nkulunkulu, mangiphikelele empini. Kodwa uma sekufika ekufeni, angisekho . . . Kuyoba yinjabulo, kuyoba yintokozo, ukungena, ngivela kulokhukubola nehlazo.

Uma ngingafinyelela, phezulu ngale, ikhulu lesigidi sezigidi zamamayela ukuphakama, iblokwe eliyisikwele, nalolo wuThando oluphelele; ngasinye isinyathelo ngapha, kuyancipha, size sifike phansi lapho esikhona manje. Kungaba nje yisithunzana sokubola, leyontwanyana esiyizwayo futhi sizwe ukuthi kukhona okuthize endaweni ethize. Asazi ukuthi Kuyini.

O, bangane bami abathandeka kakhulu, bathandwa bami, zithandwa zami zeVangeli, bantwana bami abazelwe uNkulunkulu, ngilaleleni, engingumfundisi wenu. Nina, ngifisa sengathi bekungabakhona enye indlela ebenginganichazela ngayo. Akukho-mazwi; angilitholanga; alitholakali ndawo. Kodwa ngaphesheya nje kwalokhukuphefumula kokugcina, kuyinto enhle kakhulu ngokwadlulele osewake. . . Ayikho indlela yokukuchaza. Ayikho indlela. Angikwazi nje ukukwenza. Kodwa noma ngabe yini oyenzayo, mngane, beka eceleni konke okunye uze uthole uThando oluphelele. Fika endaweni lapho ongathanda khona wonke umuntu, sonke isitha, konke okunye.

Lokho kuvakasha okukodwa Lapho, kimina, kungenze umuntu owehlukile. Ngingephinde, phinde, phinde ngibe yilowoMfowethu Branham enganginguye. Noma ngabe amabhanoyi ayagququzela, noma ngabe umbani uyabaneka; noma ngabe inhloli ingibeke isibhamu. Noma ngabe kuyini, akunandaba. Ngizophikelela empini, ngomusa kaNkulunkulu. Ngokuba, ngilishumayelile iVangeli kukho konke okudaliweyo nakuwo wonke umuntu engingakwazi ukufinyelela kuye, ngibabonisa kuleloZwe elihle ngaleya.

Kungabonakala kul'khuni. Kungathatha amandla amaningi. Angazi ukuthi kuyoba yisikhathi eside kangakanani. Asazi, ngokukhuluma ngokwenyama. I...Ekuhlolweni kwami ngelinye ilanga, wathi, "Uneminyaka engamashumi amabili-nanhlanu yokuqina, impilo enhle. Uqinile." Lokho kwangisiza. Kodwa, o, kwakungesikho lokho. Akusikho lokho. Kuyinto ephakathi kwalapha. Lokhukubola kumele kwembathe ukungaboli. Lokhu ukufa kumele kwembathe ukungafi.

Amadodana kaKishi angavuka. Ngi...Zonke izinto ezilungileyo azenzayo, anginalutho olubi engingalusho ngakho, ukupha abampofu nakuso isihawu. Futhi khumbulani, yingani, uSamuweli watshela uSawulu, "Nawe uyoprofetha." Futhi amaningi alawomadoda makhulu, abashumayeli abanamandla, bangashumayela iZwi njengezingelosi ezinkulu. Kodwa noma kunjalo kwakungesiyona intando kaNkulunkulu. UNkulunkulu kwakufanele abe yinkosi yabo. Mfowethu, dadewethu, vumela uMoya oNgwele akuhole.

Ake sikhothamise amakhanda ethu okomzuzwana.

Ngikhumbule kakhulu ekhaya futhi  
ngijahile, ngifuna ukubona uJesu,  
Ngithanda ukuzwa lezozinsimbi  
ezimnandi zokungamukela zikhala;  
Kuyokhanyisa indlela yami futhi  
kushabalalise konke ukwesaba;  
Nkosi, masibuke ngale kwekhethini  
lesikhathi.

Nkosi, mangibuke ngale kwekhethini  
lezinsizi nokwesaba,  
Mangibuke kulelozwe elinelanga  
elikhazimulayo;  
Kuyoqinisa ukhoho lwethu futhi  
kushabalalise konke ukwesaba;  
Nkosi, mababuke ngale kwekhethini  
lesikhathi.

Ngineqiniso, Nkosi, uma lelibandla elincane,  
namhlanje ekuseni, lingabuka nje ngale kwekhethini!  
Akukho nhlupheko phakathi kwabo; futhi soze  
yabakhona. Akukho kugula; akukho lutho kuphela  
ngukuphelela. Futhi kungukuphefumula kanye nje  
phakathi kwalapha naLaphaya, ukusuka ekugugeni kuya  
ebusheni, ukusuka esikhathini kuya ePhakadeni; ukusuka  
ekukhandlekeni kwakusasa, nosizi lwayizolo, kuze kube  
sesikhathini samanje sePhakade ekupheleleni.

Ngiyakhuleka, Nkulunkulu, ukuthi Uzobusisa wonke  
umuntu lapha, uma kukhona labo lapha, Nkosi,  
ongakwazi Wena ngaleyondlela yoThando. Futhi  
ngempela, Baba, ayikho into eyayingangena kuleyoNdawo  
engcwele ngaphandle kwaleyonhlobo yoThando,  
ukuZalwa okusha, ukuphinda uzalwe. UMoya oNgcwele,

uNkulunkulu, wuThando, futhi siyazi ukuthi lokho yiqiniso. Akunandaba noma sigudluza izintaba ngokukholwa kwethu, uma senza izinto ezinkulu, noma kunjalo, ngaphandle kwaLokho lapho, sasingeke neze sakwazi ukukhwela kulelolada elikhulu ngale. Kodwa naLokho, Kuyosiphakamisela ngale kwaleminako yomhlaba. Ngiyakhuleka, Baba, ukuthi Uzobabusisa abantu lapha.

Futhi sengathi, kungathi, wonke umuntu ongizwile, namhlanje ekuseni, ngikhuluma leliQiniso, Ube ngufakazi wami, Nkosi, njengoSamuweli wasendulo; “Sengake ngabatshela yini noma yini eGameni laKho ngaphandle kwalokho okwakuliqiniso na?” Bangabehluleli. Futhi ngiyabatshela manje, Nkosi, ukuthi Ungithathe wangiyisa kuleloZwe. Futhi wena uyazi ukuthi kuliqiniso.

Namanje, Baba, uma kukhona abanye abangakwazi Wena, sengathi leli kungaba yihora lokuba bathi, “Nkosi, beka ngaphakathi kimi intando ukuba kube yintando yaKho.” Siphe khona, Baba.

Namanje, nina, enikhothamise amakhanda enu, ningaphakamisa izandla zenu, bese nithi, “Ngikhulekele, Mfowethu Branham; intando kaNkulunkulu ibe ngaphakathi kimi.” [UMfowethu Branham uthi ukuthula kancane—Umhl.]

Manje uselapho nje okhona, ngobukhulu ubumnandi, yini ungavele uthi kuBaba? “Nkulunkulu, phakathi kwenhliziyo yami, namhlanje, ngilahla zonke izinto zezwe. Ngilahla konke, ukuze ngithande Wena futhi ngikhonze Wena, impilo yami yonke. Futhi ngizothi, kusukela namuhla, kuqhubeke njalo, ngilandele Wena,

kuwo wonke umBhalo weBhayibheli laKho.” Uma ungakaze ubhaphathizwe ngombhaphathizo wobuKristu, “Ngiyavuma, Nkosi.”

“Uma ngingakamamukeli uMoya oNgcwele...” Uyokwazi uma usuMamukele. Uyokunikeza. Uyokunikeza isiqiniseko noThando oludingayo. O, ungahle ukuba wenze okwahlukile, waba namadlingozi, njengokungahle ukuba umemezile noma wakhuluma ngezilimi, okungokuhle. Kodwa uma loloThando lobuNkulunkulu lungekho lapho, ngikholwe manje, thana, “Nkosi, beka ngaphakathi kwenhliziyo yami, nasemphefumulweni wami, ukufika kukaMoya waKho, ukuze ngithande, futhi ngihloniphe, futhi ngibe naloloThando lobuNkulunkulu enhliziyweni yami, namhlanje, oluyongiyisa kuleloZwe lapho ukuphefumula kwami kokugcina sekungishiya,” sisakhuleka. Khuleka, nawe, manje. Ngendlela yakho, khuleka, cela uNkulunkulu ukuba akwenzele lokho.

Ngiyakuthanda. Ngiyakuthanda. Nina besilisa abathandeka kakhulu esenimpunga enihlezi lapha, osebenze kanzima wondla abantwanyana! Nina enimpofu, omama abadala osule izinyembezi emehlweni abo! Ake nginiqinisekise ngalokhu, dade, othandekayo, akusiyo leyondlela engaphesheya kokunye ukuphefumula ngale. Ngikholwa ukuthi eqinisweni Kusendlini. Kungenye indawo nje esiphila kuyo. Lokhu kungukubola nje esiphila kukho manje.

“Kodwa vumela kimi, Nkosi, ukuba kube yintando yaKho.” Khuleka, ngenkathi sikhuleka ndawonye.

Ngokuzithoba, NKosi, phezu kwezisekelo zeZwi laKho noMoya waKho oNgcwele, siyajabula kakhulu ukuthi



siyazi ukuthi ukuzalwa kwethu kuvelaphi. Siyajabula ukuthi sa “zalwa kungengantando yendoda, nantando yenyama, kodwa ngokwentando kaNkulunkulu.”

Futhi siyakhuleka, namuhla, Baba, ukuthi laba manje abacela umusa wokuthethelelwa, ukuthi uMoya waKho uzokwenza lowomsebenzi, Nkosi. Ayikho indlela yokuba kwenziwe yimina; ngingumuntu nje, enye indodana kaKishi. Kodwa sidinga Wena, uMoya oNgcwele.

Nkulunkulu, mangibe njengoSamuweli, yena okhuluma iQiniso leZwi. Futhi Uliqinisekisile, kuze kube yimanje, futhi ngiyakholwa ukuthi Uzoqhubeka, inqobo nje uma ngihlala ngeqiniso kuWe.

Kwangathi bonke manje bangamukela ukuPhila okuPhakade, Baba. Sengathi lolusuku lungephinde lusuke kubo. Ngehora lapho sebezoshiya khona lelizwe, sengathi lokhu, engisanda kukusho kubo, kuvuleke kube liqiniso. Futhi njengoba sihlezi lapha, singabafayo, namhlanje, sibuka ewashini lethu, sicabanga ngedina lethu, ngomsebenzi kusasa, ngeminako nokukhathazeka kwempilo, akusayikuba khona ngalesoSikhathi. Kuyoshabalala konke. Akuyikubakho minako; nentokozo eyodwa enkulu yePhakade. Banike lolohlobo lokuPhila, Baba, bonke. Futhi kwangathi. . .

Ngicela kuWe lokhu, Baba, ukuthi wonke umuntu olapha namhlanje ekuseni, ongizwile ngisho lombono, sengathi ngingahlangabezana nabo bonke ngale; noma kungahle kubekhona abesilisa lapha abangavumelani nami, nabesifazane, futhi. Kodwa, Baba, ungakuvumeli lokho kume endleleni yethu. Sengathi singahlangabezana nabo ngaphesheya le Lapho, nabo bagijime, futhi, futhi sihwaphunane, simemeza, “Mfowethu othandeka

kakhulu.” Makube njengoba kwakhonjiswa Laphaya, Nkosi, kubo bonke, bonke engibathandayo, nabo bonke abangithandayo. Ngikhulekela ukuba kube ngaleyondlela, Nkosi. Futhi ngibathanda bonke. Mabavele, Baba. Ngibanika ukuPhila okuPhakade manje. Sengathi bangenza isigaba sabo, ukuKwamukela. Lokhu ngikucela eGamei likaJesu. Ameni. [UMfowethu Branham uthi ukuthula kancane—Umhl.]

Sinemizuzu embalwa nje, yokukhulekela abagulayo. Ngiyabona sinentombazanyana, egulayo lapha, nentombi esihlalweni.

Manje, kubazalwane bami abathandeka kakhulu ngokwedulele, odadewethu, ngiyacela ningabi ngabangangizwisisi. A—angazi ukuthi kwenzekani. Angazi ukuthi kwenzekani. Kodwa, Nkulunkulu, uma sengifa, angibuyele Laphaya. Ngivumele nje ngibuyele kueleyoNdawo, yilapho engifuna ukubakhona, noma kwakukuphi. Angizami ukuba nguPawulu owahlwithelwa kwawesithathu amazulu. Angisho lokho. Ngikhulwa ngukuthi Wayezama nje ukungikhuthaza, ezama ukunginika okuthize okuncane ukungiqhubela phambili, enkonzweni yami entsha ekhuphukayo.

(Ikhishwe kwethi *INkosi Elahliweyo*, Meyi 15, 1960.)

VOICE OF GOD RECORDINGS  
P.O. Box 950, Jeffersonville, Indiana 47131 U.S.A.

## Inothisi yelungelo langokomthetho

Onke amalungelo agodliwe. Lencwadi ingaprintwa kwiprinta yasekhaya yenzelwe okuqondene nomuntu noma inikezelwe, ngesihle, njengethuluzi ukusabalalisa iVangeli likaJesu Kristu. Lencwadi ingethengiswe, iphinde ikhiqizwe zibe ningi, iposwe kwiwebsayiti, igcinwe ngohlelo lokuthi iphinde itholakale, ihunyushelwe kwezinye izilwimi, noma isetshenziselwe ukuzicelela izimali ngaphandle kwemvume ebhaliwe eshiwoyo ye Voice Of God Recordings®.

Ngolwazi olwengeziwe noma olwenye impahla ekhona, siza uxhumane ne:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)